

Pembangking cetus huru-hara jika kalah PRU-13
Utusan Online
31 Mei, 2012

KUALA LUMPUR 30 Mei - Pertubuhan Pribumi Perkasa Malaysia (Perkasa) tidak menolak kemungkinan pembangkang akan menggunakan semula taktik reformasi untuk mencetuskan huru-hara sekiranya keputusan Pilihan Raya Umum Ke-13 (PRU-13) memihak kepada kerajaan Barisan Nasional (BN).

Presidennya, Datuk Ibrahim Ali berkata, berdasarkan kecenderungan pembangkang yang tidak berhenti mempertikaikan kewibawaan Suruhanjaya Pilihan Raya (SPR) dalam mengendalikan pilihan raya, Perkasa percaya rusuhan akan menjadi jalan terakhir pembangkang untuk menjatuhkan kerajaan.

"Kita tidak boleh menolak kemungkinan rusuhan boleh berlaku berdasarkan tindak-tanduk mereka yang sentiasa menanam persepsi kononnya SPR tidak telus dalam mengendalikan pilihan raya.

"Ia mungkin menjadi jalan terakhir pembangkang untuk berkuasa iaitu dengan cara menggulingkan kerajaan secara tidak sah di sisi undang-undang," katanya selepas Mesyuarat Ahli Dewan Tertinggi Perkasa di sini hari ini.

Sementara itu, Naib Presiden Perkasa, Datuk Zulkifli Noordin berkata, beliau percaya Ketua Pembangkang, Datuk Seri Anwar Ibrahim sekali lagi akan menimbulkan kekacauan secara besar-besaran dengan berdemonstrasi di jalan raya.

"Kita lihat cara mereka mempertikaikan SPR seperti mahu rakyat percaya bahawa apa sahaja keputusan PRU-13 nanti tidak boleh diterima. Itu adalah cara untuk menghalalkan rusuhan.

"Saya jangka pembangkang akan menduduki Dataran Merdeka dan beberapa lokasi strategik di Kuala Lumpur sekali lagi untuk cetuskan rusuhan," katanya.

Beliau berkata, usaha pembangkang untuk mencetuskan huru-hara itu mungkin sedang dirancang sebagai persediaan sekiranya mereka kalah teruk pada pilihan raya umum akan datang.

Tambah beliau, Anwar bukan sahaja tidak yakin dapat memenangi pilihan raya bahkan beliau juga takut untuk berdepan dengan sokongan rakyat yang semakin meningkat kepada kerajaan BN.

"Dia sendiri tahu pembangkang tidak mampu untuk menang pada pilihan raya umum akan datang. Dia juga tahu Pas akan kalah teruk dengan apa yang berlaku sekarang.

"Bila Pas kalah, dia akan jadikan itu sebagai alasan untuk mempertikaikan kewibawaan SPR dan memfitnah pilihan raya itu kotor," katanya.

Justeru beliau menggesa kerajaan supaya mengambil tindakan tegas terhadap pihak-pihak yang sengaja mempersoalkan ketelusan SPR dan mencabar pihak berkuasa keselamatan.

"Sebab sekarang kita dah tak ada Akta Keselamatan Dalam Negeri (ISA), kita minta pihak berkuasa ambil langkah pencegahan demi keselamatan rakyat.

"Perkasa dan beberapa pertubuhan bukan kerajaan (NGO) sedia untuk memperhalusi perkara ini bagi membantu kerajaan menjaga keamanan," tambah beliau.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0531&pub=Utusan_Malaysia&sec=Politik&pg=po_04.htm